

An illustration in a flat, muted color palette. A soldier in silhouette, wearing a helmet and carrying a rifle, is shown from the side, carrying a large red flag. The flag is the central focus and contains white text. In the background, there are silhouettes of buildings and three parachutes falling from the sky. The overall style is graphic and historical.


# DAN GRADA SARAJEVA

Mladi historičari

13

# Njemački avioni i opsada JNA

6. aprila Sarajevo je doživjelo dva rata i jedno oslobođenje. Na taj dan u rano jutro 1941. godine napadom njemačkih aviona na aerodrom Rajlovac, u sklopu napada na tadašnju Kraljevinu Jugoslaviju, i Sarajevo je, zajedno sa svojim stanovnicima, gurnuto u najstrašnji sukob od postanka čovječanstva – u Drugi svjetski rat. U samo predvečerje tog datuma 1992. godine, tadašnja JNA i formacije, koje će kasnije postati Vojska Republike Srpske, počele su zločinačku opsadu Sarajeva, dugu 1425 dana. I presude Međunarodnog suda za ratne zločine u Hagu potvrdile su da je to najduža i najstrašnja opsada jednog grada u novijoj istoriji svijeta tokom koje je ubijeno oko 11 500 ljudi, među kojima i 1601 djece.

A stylized illustration of a man in profile, wearing a dark uniform and a peaked cap. He is saluting with his right hand raised to his forehead. The background is a light beige color with some abstract shapes and a small map outline in the bottom left corner.

Na isti taj datum, 6. aprila 1945. godine, Sarajevo je, nakon četvorogodišnje okupacije, oslobođeno od najstrašnijeg zla u ljudskoj civilizaciji, od fašizma. Tako je taj datum, kažu historičari, preplićući historijske događaje u teškim vremenima, u nekoliko navrata imao sudbinski značaj za Sarajevo i neizbrisivo se utkao u hronologiju njegovog postojanja.



“

„Gdje god se čovjek okrene u Sarajevu, za 6. april ga vežu istorijske uspomene“, više kao za sebe, sjetno govori vremešni Sarajlija, gledajući niz Miljacku od biste narodnog heroja Vladimira Perića Valtera, koji je poginuo prilikom oslobađanja grada 6. aprila 1945. godine, prema Mostu Suade Dilberović i Olge Sučić, prvih žrtava opsade, koje su srpski snajperisti ubili uoči samog 6. aprila 1992. godine.

Također, treba napomenuti i da je 6. aprila 1992. godine, tadašnja Evropska zajednica priznala Republiku Bosnu i Hercegovinu kao nezavisnu državu. Nažalost, dok se zastava sa Ljiljanima vijorila ispred zgrade UN-a u New Yorku, srpske snage granatirale su stari dio grada i otpočele najdužu blokadu jednog grada u historiji ratovanja, olimpijskog grada Sarajeva.

Gađani su bolnica Koševo, Jezero i Vojna bolnica, zgrada Oslobođenja, RTV dom, televizijski toranj, tramvaji, Hotel Bristol, Hotel Evropa, univerzitetske zgrade, groblja, Vijećnica, vjerski objekti, zgrada Parlamenta...






# Armija Republike Bosne i Hercegovine



- Grad je ostao bez struje, grijanja, vode, lijekova i ostalih medicinskih potrepština. Međutim, tokom ovog vremena, neprijateljske snage nisu bile u mogućnosti da pokore grad, zahvaljujući herojskoj odbrani Sarajeva, ponajviše **Armije Republike Bosne i Hercegovine**. Poslije potpisivanja Dejtonskog sporazuma i perioda stabilizacije države i grada, bosanskohercegovačka vlast je odredila 29. februar 1996. kao službeni datum prestanka opsade grada na Miljacki.





**Nakon rata grad se ponovo izdigao iz pepela i vratio na stare staze mjesta u kojem se isprepliću različite religije i kulture. Uzimajući u obzir važnost ovog datuma kroz njegovu historiju, Gradsko vijeće je na sjednici 2006. godine donijelo odluku kojom je 6. april određen kao Dan grada Sarajeva.**



Sarajevo, sedam i po decenija od Drugog svjetskog rata i dvije i po decenije od agresije, nije prevazišlo svoju prošlost, kako se to potencira i priželjkuje, a već su ga dobrano pritisluli novi izazovi, uz sve i pandemija koronavirusa koja nikoga u svijetu nije zaobišla i ostavila ravnodušnim.

